

Na osnovu člana 69. Zakona o organizaciji organa uprave u FBiH ("Sl. novine FBiH ", br.35/05), člana 41. Odluke o plaćama i naknadama u Jedinostvenom općinskom organu uprave i ostalih službi općine Ilijaš ("Sl. novine Kantona Sarajevo", br. 6/13) i člana 57. i 107. prečišćenog teksta Statuta općine Ilijaš ("Sl. novine Kantona Sarajevo", br.20/09),uz saglasnost sindikalne organizacije organa uprave općine Ilijaš, Općinski načelnik donosi:

P R A V I L N I K

o plaćama i naknadama u Jedinostvenom općinskom organu uprave i
ostalim službi općine Ilijaš

Član 1.

Ovim Pravilnikom uređuju se uslovi , kriteriji i način ostvarivanja plaća, naknada i drugih materijalnih prava koja pripadaju državnim službenicima i namještenicima u Jedinostvenom općinskom organu uprave i ostalih službi općine Ilijaš.

I PLAĆE

Član 2.

Plaća državnih službenika i namještenika utvrđuje se množenjem osnovice za plaću sa utvrđenim koeficijentom platnog razreda.

Osnovicu za obračun plaća određuje Općinski načelnik uz saglasnost sindikalne organizacije organa uprave općine Ilijaš.

Plaća se obračunava za jedan mjesec unatrag, a isplaćuje za prethodni mjesec u skladu sa Zakonom o radu i Odlukom o izvršavanju budžeta općine Ilijaš.

Član 3.

Prema vrsti i složenosti poslova i zadataka odnosno stručnoj spremi utvrđuju se grupe poslova i zadataka sa platnim razredima i koeficijentima kako slijedi :

Rukovodioci službi i državni službenici

| Platni razred | Radno mjesto | Koeficijent |
|---------------|--|-------------|
| I | Sekretar | 5,2 |
| II | Rukovodilac općinske službe za upravu – Pomoćnik načelnika | 5,20 |
| III | Rukovodilac posebne općinske službe | 4,85 |
| IV | Rukovodilac osnovne organizacione jedinice u kojima ne rukovodi rukovodeći državni službenik | 4,6 |
| V | Šef odsjeka | 4,50 |
| VI | Općinski inspektor | 4,30 |
| VII | Stručni savjetnik | 4,10 |
| VIII | Viši stručni saradnik | 3,90 |
| IX | Stručni saradnik | 3,70 |

Namještenici

| Platni razred | Radno mjesto | Koeficijent |
|---------------|---|-------------|
| I | - šef unutrašnje organizacione jedinice (VŠS) | 3,20 |
| II | - viši samostalni referent (VŠS) | 3,10 |
| III | - samostalni referent (VŠS) | 3,00 |
| IV | - šef unutrašnje organizacione jedinice (SSS) | 2,80 |
| V | - viši referent (SSS) i VKV radnik | 2,70 |
| VI | - referent (SSS) i KV radnik III i IV stepena | 2,60 |
| VII | - pomoćni radnik i nekvalifikovani radnik (NK radnik) | 1,85 |

II NAKNADE

Član 4.

Državni službenik i namještenik imaju pravo na naknade kako slijedi:

(Naknada za prekovremeni rad, rad u neradne dane, noćni rad i rad u dane državnih praznika)

U slučaju prekovremenog rada, rada u neradne dane, noćnog rada ili rada u dane državnih praznika, državni službenik i namještenik imaju pravo na naknadu osnovne plaće, razmjerno vremenu trajanja tog rada, uvećanom za postotak kako slijedi:

- a) za prekovremeni rad najmanje 50%,
- b) za rad u neradne dane najmanje 30%,
- c) za rad noću najmanje 35%,
- d) za rad u dane državnih praznika najmanje 50%.

Naknade odnosno uvećanja plaće iz stava (1) ovog člana ostvaruju se donošenjem rješenja u kome će biti precizno naznačeni :vrsta poslova, period obavljanja poslova i broj izvršilaca poslova.

Obračun naknada iz stava (1) ovog člana vrši se od osnovne plaće bez dijela plaće po osnovu penzijskog staža. Naknade iz ovog člana čini sastavni dio plaće.

(Plaćeni dopust)

Državni službenik i namještenik imaju pravo na plaćeni dopust u dužini od 30 dana u visini svoje neto plaće iz prethodnog mjeseca.

(Naknada za ishranu tokom rada)

Državni službenik i namještenik imaju pravo na novčanu naknadu za ishranu u toku rada (topli obrok), u visini 1% prosječne neto plaće isplaćene u Federaciji Bosne i Hercegovine po zadnjem statističkom podatku.

(Regres za godišnji odmor)

Državni službenik i namještenik imaju pravo na naknadu na ime regresa za korištenje godišnjeg odmora u visini 50% prosječne neto plaće isplaćene u Federaciji Bosne i Hercegovine po zadnjem objavljenom statističkom podatku.

Pravo na regres iz stava (1) ovog člana ima svaki državni službenik i namještenik koji u toku tekuće kalendarske godine ima pravo na godišnji odmor.

(Naknada za bolovanje)

Državni službenik i namještenik imaju pravo na naknadu plaće za vrijeme privremene spriječenosti za rad (bolovanje) do 42 kalendarska dana u visini njegove neto plaće isplaćene za prethodni mjesec.

Naknada plaće za bolovanje preko 42 dana iz stava (1) ovog člana ostvaruje se po propisu Kantona Sarajevo kojim se uređuje naknada za ovo bolovanje, s tim da razliku do pune plaće isplaćuje organ uprave općine Ilijaš.

(Naknada za porodijski dopust)

Državni službenik ili namještenik za vrijeme porodijskog dopusta ima pravo na naknadu plaće prema propisima Kantona Sarajevo kojim se uređuje ova oblast, prema mjestu uplate doprinosa, s tim da razliku do visine pune plaće uplaćuje organ uprave općine Ilijaš.

(Naknada za službeno putovanje)

Državni službenik i namještenik imaju pravo na naknadu za troškove službenog putovanja na području Federacije Bosne i Hercegovine, odnosno Bosne i Hercegovine, kao i za putovanja u inostranstvo, na koje se upućuju na izvršenje službenog zadatka.

Visina i način ostvarivanja naknade iz stava 1. ovog člana utvrđeni su Pravilnikom o naknadama troškova službenog putovanja koji je donio Općinski načelnik, a u skladu sa Kolektivnim ugovorom.

(Naknada za prijevoz na posao i s posla)

Državnom službeniku ili namješteniku kome nije organizovan službeni prijevoz na posao i s posla, a čije je mjesto stanovanja od mjesta rada udaljeno najmanje 2km, pripada naknada za troškove prijevoza u visini mjesečne karte gradskog, prigradskog i međugradskog saobraćaja, osim u vrijeme korišćenja godišnjeg odmora i bolovanja, a koje utvrđuje Općinski načelnik rješenjem a na osnovu dokaza o mjestu prebivališta.

U međugradski saobraćaj spadaju mjesta koja su udaljena od mjesta rada do 70 km.

(Naknada za slučaj povrede na radu, teške bolesti i invalidnosti)

U slučaju povrede na radu, teške bolesti ili invalidnosti državnog službenika ili namještenika ili člana njegove uže porodice, isplaćuje se jednokratna novčana pomoć u visini od dvije prosječne neto plaće isplaćene u Federaciji Bosne i Hercegovine prema zadnjem objavljenom statističkom podatku.

Utvrđivanje šta spada u tešku bolest i invalidnost odlučuje komisija koja se formira na prijedlog Načelnika i sastoji od tri člana i to: jedan član iz Službe iz koje dolazi uposlenik, drugi iz Službe za opću upravu i lokalnu samoupravu i treći predstavnik sindikata.

Komisija donosi odluku da li je zahtjev opravdan .

(Naknada za slučaj smrti i pravo na osiguranje od posljedica nesretnog slučaja)

U slučaju smrti državnog službenika, odnosno namještenika njegovoj užoj porodici se isplaćuju troškovi sahrane u visini od četiri prosječne neto plaće isplaćene u Federaciji Bosne i Hercegovine prema zadnjem objavljenom statističkom podatku.

Članom uže porodice državnog službenika ili namještenika, u smislu stava (1) ovog člana smatraju se:

- bračni i vanbračni drug ako žive u zajedničkom domaćinstvu,

- dijete

- roditelji pod uvjetom da žive u zajedničkom domaćinstvu ,

- braća i sestre bez roditelja do 18 odnosno do 26 godina starosti ako se nalaze na redovnom školovanju i nemaju drugih prihoda već ih korisnik naknade stvarno izdržava ili je obaveza njihovog izdržavanja

zakonom utvrđena, a ako su nesposobni za rad, bez obzira na starosnu dob, pod uslovom da s njima živi u zajedničkom domaćinstvu

-unučad ako nemaju roditelja i žive u zajedničkom domaćinstvu s službenikom ili namještenikom.

Državni službenik i namještenik imaju pravo na osiguranje od posljedica nesretnog slučaja sa uključenim rizikom od prirodne smrti za vrijeme trajanja radnog odnosa u organima državne službe.

Ugovor o osiguranju sa odgovarajućom osiguravajućom kućom zaključuje Općinski načelnik za sve državne službenike i namještenike zaposlene u organu uprave općine Ilijaš u skladu sa kolektivnim ugovorom.

Dokazivanje da podnosilac zahtjeva je uži član obitelji i živi u zajedničkom domaćinstvu vrši se prilaganjem kućne liste.

(Otpremnina)

Državni službenik i namještenik imaju pravo na otpremninu pri odlasku u penziju u visini svojih pet ostvarenih prosječnih neto plaća isplaćenih u prethodnih pet mjeseci.

(Naknada u slučaju prekobrojnosti)

U slučaju prestanka radnog odnosa državnog službenika odnosno namještenika zbog prekobrojnosti, taj državni službenik odnosno namještenik ima pravo na naknadu u iznosu :

- a) za radni staž do 10 godina, naknada iznosi tri neto plaće državnog službenika odnosno namještenika.
- b) za radni staž od 11 do 30 godina, naknada iznosi šest neto plaća državnog službenika/namještenika.
- c) za radni staž preko 30 godina, naknada iznosi deset neto plaća državnog službenika/ namještenika.

(Naknada za rad u komisijama)

Članovi komisija koje se formiraju na osnovu rješenja Općinskog načelnika, a čije je osnivanje predviđeno zakonom imaju pravo na maksimalnu mjesečnu naknadu za rad u komisija do visine jedne i pol osnovice iz člana 5. ove Odluke.

Tačan iznos odnosno visinu naknade za rad svojim rješenjem utvrđuje Općinski načelnik za svaku pojedinačnu komisiju.

Naknade za rad u komisijama iz stava 1. ovog člana, a koje se finansiraju od uplata fizičkih ili pravnih lica, ne ulaze u ograničenje iz stava 1. ovog člana.

III DODACI NA PLAĆU

Član 5.

Državnom službeniku i namješteniku koji rade na poslovima kod kojih postoje posebni uslovi rada može se utvrditi pravo na poseban dodatak na osnovnu platu.

Utvrđuje se poseban dodatak na osnovnu plaću za sljedeća radna mjesta:

- 1. Uposlenici Centra za pružanje usluga do 10%;
- 2. Uposlenici koji su učestvovali u postupku izrade rješenja, a gdje se zahtjeva rad na terenu do 10% ,a koji se dokazuje izvještajem rukovodioca službe koji se dostavlja Odsjeku za finansije i Odsjeku za opću upravu.
- 3. Uposlenici koji vrše poslove u uvećanom obimu duže od 30 dana do 10% na osnovu rješenja Općinskog načelnika.

Uposlenik može u toku jednog mjeseca ostvariti gore navedene dodatke na plaću samo po jednom osnovu.

Član 6.

Ovaj Pravilnika stupa na snagu 01.02.2013.godine, a prestaje primjena Pravilnika o plaćama , naknadama i drugim materijalnim pravima koja nemaju karakter plaće , br.01-II-02-50.1/06, od 16.01. 2006. godine.

Broj:01/2-34-340/13
Ilijaš,01.02.2013.godine

OPĆINSKI NAČELNIK
Akif Fazlić,dipl.ecc